

Statistika delnjołužiskich Serbow.

I. Wopisanje delnjołužiskeho Serbowstwa.

(Z lěta 1880.)

Zawod.

Běch sebi hižo dawno předewzał, raz cyły delnjoserbski kraj přepućować, zo bych jón, runjež hižo wjele stron derje znajach, dospołnje zeznał a pódla přepytał, kak daloko mjezy Delnjeho Serbowstwa nětko du a hač je wot lěta 1843, w kotrymž naš J. E. Smolef z druhim zwjazkom serbskich ludowych pěśničkow přenju serbsku ethnografisku khartu wuda, woprawdže telko so přeněmčiło, kelkož Richard Andree we swojej znatej knižcy „Wendische Wanderstudien (1874)“ wudawa. Tuto swoje předewzaće wuwjedžech we wulkich prózdninach lěta 1880 pućujo ze swojim přećelom k. řečnikom Alfonsom Parczewskim přez tři njedžele nimale po cyłych Delnich Łužicach. Dołho njemějach dla druhich nuznych a njewotstorčnych džělow khwile swoje tehdy činjene zapiski wobdžělać a za čišć spřihotować. W zašłym lěće 1883 skónčnje sebi čas wotdobyh a započach kruchi ze swojeho pućowanja we „Łužicy“ (ča. 4, 6, 7) pod napismom: „Dundanki a dróhowanki po Delnich Serbach“ wozjewjeć, ale bórzy widžach, zo dyrbjju z tutymi nastawkami dla jich wobšěrnosće pak lěta dołho pokračować pak wjetši džěl kóždého čisła pjelnić. Woboje by wězo njespodobne było. Tuž wobzamknuch nazhonjenja z tutoho swojeho dróhowanja skónčnje donapisać a wospjetujo tamnaj nastawkaj z Łužicy zhromadnje w časopisu Maćicy Serbskeje zjawnosći přepodać, myslo sebi, zo budže tola tomu a druhemu zajimawo zhonić, kak so w Delnich Serbach wěcy maju. Za přichodne generacije pak to njech je swědčenje wo zrudnym postawje našich delnjoserbskich bratrow w lěće 1880. Chcu pak tu wšo „sine ira ac studio“, sprawnje, bjez debjenja a